

E Trabou Mas Difísil na Mundu

Nan no ta kana ku bòrchi i protestá nan situashon difísil, nan no ta haña kondekorashon di la reina, nan kasonan kompliká no ta sali den publisidat. Ma si bo para ketu un ratu, lo bo ripará ku nan ta tur rònt di bo: un mama òf tata hasiendo esfuersonan heróiko pa kria su yunan su so, sin sostén òf apoyo di un kasá.

Maske e fenómeno di mayor soltero no ta limitá na un sekso, ta opvio ku esun ku ta hañ'é den e situashon aki ku mas frekuensia, i esun pa ken mayoria bes e ta kai komo un sla mas duru, ta e mama. Normal un tata soltero tin mas rekursu ku e muhé ku ta keda ku e tarea solterario aki.

Estudionan 30 aña pasá a opservá ku 90% di e storia di bida di un mucha muhé di 16 aña ku ta sali na estado ya kaba ta skirbí. “Probabelmente e lo kita di skol; asta si un otro pèrsona den su famia ta yud'é kuida e beibi, probabelmente e lo no logra haña un trabou fast ku ta paga sufisiente pa proveé p'é i su yu; e por sintié obligá pa kasa ku un pèrsona ku e lo no a skohe bou di otro sirkunstansianan. Su oportunidatnan den bida ta poko...” Ku poko eksepsion, ainda e deskripsion ei ta kuadra awendia.

Ma e mayor soltero no ta pasa den un trastorno komo tineidjer so. Komo adulto e situashon ta keda hopi difísil. Pensa un ratu tokante algun lucha diario di un mama soltero.

Plaka ta hunga un ròl importante; no por biba sin sèn. E mama soltero ta hañ'é obligá pa buska trabou, forsando e pa kontestá hopi pregunta kompliká. Si e por haña trabou anochi, ken lo keda ku e yunan i pone nan drumi? Si ta trabou den dia, kiko lo e hasi ku e yunan miéntras e ta na trabou? Krèsh pa esnan chikitu. Skol pa esnan mas grandi. Ma kiko nan mester hasi ora nan yega kas di skol i mama no t'ei? Ken lo wak nan?

Hopi bes, e sèn ku e ta kobra kasi no ta kubri su gastunan. Amigunan di su yunan tin televishon kabel, kompiuter, paña karu, fakansi den eksterior...kosnan su yunan nunca por gosa.

Su bida ta para bira manera un disko ku a pega: trabou, kas, trabou, kas, trabou, kas. Ora ku trabou ta kaba, maske e ta morto kansá, purá e tin ku bai buska un yu na krèsh, hasi kompras, buska e otro yu serka bisiña, kushiná, laba tayó, i ya kaba ta tempu pa e yunan bai drumi. Pa kolma, siendo kansá, e ta hasi esaki ku mal beis, gritando e muchanan. E ta sintié kulpabel, e ke ta un mihó mama, e ke dediká mas tempu pa su yunan.

E tarea di un mayor soltero ta demandá su atenshon, energia, i tempu 24 or pa dia...i tin bes mas. No tin tempu despues di trabou, pa hasi loke e mes tin gana di hasi. Ainda e tin ku hasi kas limpi, paga gastunan, laba paña, buska hende pa drecha kranchi, èts. Kasi e ta sinti ku e no tin tempu pa pensa. Maske e ta stima su yunan, e ta sintié komo un presu, kondená na un bida solitario, sin por sali ku amiganan, katibu di su propio yunan. E disko ta sigui toka: trabou, kas, trabou, kas, trabou, kas.

Si bo tin un kasá ku ta yuda kria bo yunan, yama Dios danki. Ma no lubidá ku bo tambe por hañábo den e situashon difísil aki. No ta e mucha muhé hóben ku su yònkuman ta lag'é na kaya ora e ta sali na estado so ku por keda un mama soltero. Bèrdat, e ta sufri e konsekuensia di su piká. Pero esei no ke mèn ku bo ta mihó kuné i ku bo no por bira un mayor soltero.

Algun mayor ta keda so ku nan yunan dor di separashon òf divorsio. Kasi nunca ta realístiko pa divorsiá keriendo ku bida di mayor soltero lo ta mihó. Dios ta bisa “*Mi ta odia diborsio*” (Malakias 2:16). Esun ku ta hasié tòg lo sufri e konsekuensianan. I kòrda tambe ku asta esun ku tin un bon matrimonio por bira un mayor soltero den un será di wowo dor di morto su kasá.

Dios por ta “*un tata di wèrfano i un hues pa biuda*” (Salmo 68:5). Si bo konfi'E, E lo no lagábo na kaya. Maske bo hañábo so den e situashon aki, Dios ke ta bo sosten i Amigu, guiando bo pa medio di Skritura den e trabou mas difísil di mundu.